

彊邨叢書



蒲江詞彙目錄

宴清都

魚遊春水

倦尋芳

江城子

西江月

畫堂春

清平樂

烏夜啼

謁金門

鷓鴣天

踏莎行

琴調相思引

眼兒媚

更漏子

錦園春

水龍吟

渡江雲

洞仙歌

望江南

臨江仙

醜奴兒慢

木蘭花慢五

浣溪沙

卜算子四

滿庭芳

夜行船

瑞鶴仙

菩薩蠻三

鵲橋仙三

摸魚兒

夜飛鵲慢

秋霽

虞美人

漁家傲三

醉梅花

賀新郎

沁園春二

賀新郎二

太常引

小闌干

倚闌令

滿江紅二

燭影搖紅

臨江仙

月城春

洞仙歌

蒲江詞藁

永嘉 盧祖皋 申之

宴清都初春

春訊飛瓊管風日薄度牆啼鳥聲亂江城次第笙歌翠
合綺羅香暖溶溶澗淥冰泮醉夢裏年華暗換料黛眉
重鎖隋堤芳心還動梁苑新來雁闊雲音鸞分鑑影
無計重見啼春細雨籠愁澹月慙時庭院離腸未語先
斷算猶有憑高望眼更那堪芳草連天飛梅弄晚
魚遊春水

離愁禁不去好夢別來無覓處風翻征袂觸目年芳如
許軟紅塵裏鳴鞭鐙拾翠叢中句伴侶都負歲時暗關

情緒昨夜山陰杜宇似把歸期驚倦旅遙知樓倚東
風凝顰暗數寶香拂拂遺鴛錦心事悠悠尋燕語芳草
暮寒亂花微雨

倦尋芳

香泥壘燕密葉巢鶯春晦寒淺花徑風柔著地舞裊紅
軟鬪草煙欺羅袂薄鞦韆影落春遊倦醉歸來記寶帳
歌慵錦屏香暖別來悵光陰容易還又酴醾牡丹開
偏妒恨疏狂那更柳花迎面鴻羽難憑芳信短長安猶
近歸期遠倚危樓但鎮日繡簾高捲

江城子

畫樓簾幙捲新晴掩銀屏曉寒輕墜粉飄香日日喚愁

生暗數十年湖上路能幾度著娉婷
年華空自感飄零擁春醒對誰醒
天闊雲閒無處覓簫聲載酒買花年
少事渾不似舊心情

又壽外姑外舅

護霜雲日靄晴空錦圍中捲香風
弄玉乘鸞人自蕊珠宮天遣歲寒爲
伴侶還待得謫仙翁等閒隨處是春
功笑相從寸心同不羨魚軒蟬冕共
榮封只愛階庭蘭玉秀梅不老對喬松

又外舅作梅坡因壽日作此

小山初築自天成架危亭與雲平面
面梅花闌檻十分清喚得長淮春意
滿香暗度月微明數枝長憶傍巖

扁杖藜輕醉中行笑問東風何日是歸程只怕和羹消
息近天未許遂幽情

西江月

燕掠晴絲裊裊魚吹水葉粼粼禁街微雨灑香塵寒食
清明相近漫著宮羅試暖閒呼社酒酬春晚風簾幙
悄無人二十四番花訊

畫堂春

玉屏回夢月平闌元來香冷衣單柳風特地更將寒吹
上眉端雲羽未回征雁鏡花空舞雙鸞去年芳徑又
爛斑門掩春閒

又

柳黃移上袂羅單酒醒嬌蹙風鬟茗甌纔試鷓鴣斑沈
炷熏殘夜雨可無歸夢曉風何處征鞍海棠開了尙
憑闌剗地春寒

又

柳塘風緊絮交飛漾花一水平池暖香飄徑日遲遲何
處酴醿胡蝶夢中寒淺杜鵑聲裏春歸鏡容不似舊
家時羞對清溪

清平樂

鏡屏開曉寒入宮羅峭脈脈不知春又老簾外舞紅多
少舊時駐馬香階如今細雨蒼苔殘夢不堪重理一
雙胡蝶飛來

又

柳邊深院燕語明如翦消息無憑聽又嬾隔斷畫屏雙
扇寶杯金縷紅牙醉魂幾度兒家何處一春遊蕩夢
中猶恨楊花

又

玉肌春瘦別鳳離鸞後柳外畫船看翠袖眼豔風流依
舊杏梁語燕綢繆可堪前夢悠悠幾度欲成花雨斷
雲還過南樓

又庚申中吳對雪

朔風凝冱不放雲來去穉柳回春能幾許一夜滿城飛
絮羊羔酒面頻傾護寒香緩嬌屏喚取雪兒對舞看

他若箇輕盈

鳥夜啼

幾曲微風按柳生香暖日蒸花鴛鴦睡足芳塘晚新綠
小窗紗尺素難將情緒嫩羅還試年華憑高無處尋
殘夢春思入琵琶

又

照水飛禽鬪影舞風小徑低花征鴻排盡相思字音信
落誰家繫恨腰圍頓減禁愁酒力難加樓高日暮休
簾捲芳草滿天涯

又

柳色津頭泣綠桃花渡口啼紅一春又負西湖醉離恨

雨聲中 客袂迢迢西塞餘寒翦翦東風誰家拂水飛
來燕惆悵小樓東

又西湖

濛濛暖紋波颭颭吹晴絲雨濛濛輕衫短帽西湖路花氣
撲春驄 鬪草褰衣溼翠鞦韆瞥眼飛紅日長不放春
醪困立盡海棠風

又

段段寒沙淺水蕭蕭暮雨孤篷香羅不共征衫遠砧杵
客愁中 別恨慵看楊柳歸期暗數芙蓉碧梧聲到紗
窗曉昨夜幾秋風

謁金門

風不定移去移來簾影一雨林塘新綠淨杏梁歸燕竝
翠袖玉屏金鏡日薄綺疏人靜心事一春疑酒病鳥
啼花滿徑

又

蘭棹舉相趁落紅飛去一隙輕簾凝睇處柳絲牽不住
昨日翠蛾金縷今夜碧波煙渚好夢無憑窗又雨天
涯知幾許

又

閒院宇獨自行來行去花片無聲簾外雨峭寒生碧樹
做弄清明時序料理春醒情緒憶得歸時停棹處畫
橋看落絮

又

深院靜隔葉鳴禽相應金鴨雲寒閒夢醒轉簾花月影
閒步碧階香徑彈翠殘紅慵整明日陰晴猶未定試
教移小艇

又

寒半退斜掩小屏珠翠柳眼纔醒桃欲醉日高簾影碎
暗解鴛鴦羅帶獨立晚風誰會心事悠悠人好在畫
橋流水外

又

人寂寞簾外翠陰如幄團扇藤牀花閒錯雨邊殘夢覺
翠淺粉銷香薄臨鏡不忺梳掠新恨悠悠無處託棋

聲閒院落

又

閒睡足冰柱亂敲寒玉簇簇庭陰嘉樹綠晚蟬聲斷續
一雨藕花新浴香破小窗幽獨重理焦桐尋舊曲隔
牆風動竹

又

香漠漠低捲水風池閣玉腕籠紗金半約睡濃團扇落
雨後涼生雲薄女伴棹歌聲樂採得雙蓮迎笑剝柳
陰多處泊

又

秋幾許荒蓼敗荷煙渚貼水飛鷗江欲暮風帆追急羽

蝶夢轉頭無據愁到曲屏深處寒入雙城局繡戶也
應聞細雨

又

羅袖褪短鬢獨搔誰恨葉葉秋聲風袞袞萬端心一寸
釵鳳鏡鸞誰問想見粉香啼損倩盡飛鴻終未穩夜
來寒陡頓

鷓鴣天

纖指輕拈小砑紅自調宮羽按歌童寒餘芍藥闌邊雨
香落餘釀架底風閒意態小房櫳丁寧須滿玉西東
一春醉得鶯花老不似年時怨玉容

又

庭綠初圓結蔭濃香溝收拾舊梢紅池塘少歇鳴蛙雨
簾幙輕迴舞燕風春又老笑誰同澹煙斜日小樓東
相思一曲臨風笛吹過雲山第幾重

又

岸柳黃深綠已垂庭花紅徧白還飛幾回畫蠟銀臺夢
雙字香羅金縷衣山淺澹水茫瀾頓無消息許多時
杏梁知有新來燕下卻重簾不放歸

踏莎行

夜雨燈深春風寒淺梅姿雪態憐嬌軟錦牋閒軸舊緘
情酒邊一顧清歌徧玉局彈愁冰絃寫怨幾時纖手
教重見小樓低隔一街塵爲誰長恁巫山遠